

南平縣志卷之十二

人物

鄉賢

馭堅也人臣以手致力之意率土皆臣隨其所居之位而不遺餘力斯以賢稱焉鄉大夫三年大比使民興賢夫十室必有忠信况集數千年之醞釀萃數百里之菁華賢才之輩出不其宜乎是以出處不必一途潛見各有異趣苟其致身通顯分繼圭組忠葵勁草馳芬斯在若使終老窒衡寄情邱澤亦足以嘯傲乾坤陶鎔井里夫善士不近名而其名不可不傳者所以示勸也今日黌序內春秋俎豆莘莘然薦馨香於儀熙諸賢者俟諸百世無替焉後之君子亦思所以自爲位置也乎志鄉賢

人物

鄉賢

宋

吳儀

吳熙

范廸簡

黃裳

張維

馮夢得

吳儀字國華熙從父輔次子學問該博模範端嚴

楊時雅重之為題其釣臺咏歸堂及亭館諸勝

羅從彥嘗從之遊其後與熙並祀鄉賢父輔字

鼎臣少孤兄仲已鞠之使力學自奮登天聖八

南平縣誌

卷之十二

鄉賢

二

年進士吳氏以學起家自輔始歷道州推官時

蠻獠騷動有傳寇薄城者郡僚惶懼欲撤橋嬰

城守輔曰橋以南皆吾民也其可棄乎聞者壯

之民心以安寇亦不至監司知其能鄰郡有訟

不能直者並使鞠之攝耒陽醴陵二邑篆既去

民攀留以千數改著作郎知臨川縣以事忤上

官意謫台川酒務徙南城令歷屯田員外郎致

仕歸輔生平以道德教化為己任與人落落不

苟合在台州日於稅廨建一軒扁曰怡軒因以

□鄉賢祠自宋迄

□國朝□祀二十八人

□□僅載一十三人

□□□十五人雖其

□□散見於選舉文

□□□忠烈孝義各

類而鄉□□亦當備

載□□□□十五人

□□□□此卷今因

□□□□明以後

□□□□

自號有詩文數百篇楊龜山爲之序

吳熙字季明勵志力學潛心經史或與之談道論文輒傾吐終日亶亶不倦著有三傳通解二卷禮記講義十卷孝經一卷詩文集三卷藏春語錄號東山先生

范迪簡字道卿慶歷六年進士陳襄得其文二軸大加稱賞嘗爲趙抃引薦後調官至闕下不肯一謁議者偉之子峒岫岵嶠俱登科岫官至龍圖閣直學士

南平縣誌

卷之十二

鄉賢

三

黃裳字冕仲一字道夫爲諸生時常有魁天下志博學多通尤邃禮經元豐五年舉進士第一政和間知福州累遷端明殿學士禮部侍郎時方行三舍法裳謂宜近不宜遠宜少不宜老宜富不宜貧不如遵祖宗科舉之制人以爲確論建炎中年八十七卒著有演山集六十卷

張維字振綱一字仲欽紹興中登第初調賀州司理叅軍不行徙汀州軍事推官盜起屬邑附從萬衆抄掠三郡境維護巡尉兵會大軍討平之

身履巢窟撫其餘衆秩滿丞龍溪改左宣教郎知閩縣首定差役條約貲倍者半其停年民以爲便遂著爲令積餐錢數十萬義不自取民號曰張太清以便親自請得主管崇道以歸會陳正獻公知建康府辟通判府事又遣攝守當塗吏戢而民安之擢廣南西路提點刑獄公事自虜再通好維每謂符離之役失於輕舉而人心終不以爲非四郡之棄急於休息而人心終不以爲是先嘗告執事者宜將順正揀使上於起

居食息不替坐薪嘗膽之誠修明政事使人心曉然知朝廷未忘中原之念及對遂以立志開上心且引益之所以戒舜者以謂今日正當汲汲自治不可狃於小康便謂太平語甚切至孝宗曰朕何敢望舜維對曰有爲者亦若是願陛下加之意而已孝宗嘉納且俾察部內守令臧否以聞到部案行周徧郡縣陳船渡海所至邊氓歎噉以爲百年未始見使者旌節官吏有望風解綬去者還臺條上臧否若干人卽日施行

就除直祕閣知靜江府主管經畧安撫司公事
平易近民撫循周洽間召長老從容與語授以
教條使轉相告戒禁吏妄賦奏減經總之額滯
訟或數歲不決者取故牘置便坐暇日躬閱視
予奪咸得其情有暴橫若亡匿者立誅斬作興
學舍按故典新社稷風雨壇壝月遣官屬潔除
爲圖以著其兆域修登降之位甚飭南丹徭莫
氏以賂結永樂王氏藉兵以逐其兄而自立旣
立背約王氏以兵攻之莫氏困急請輸並塞田

及銀冶稅場以乞師寮屬咸謂受之便維曰莫
王連兵正坐貪此耳又將以啗我卽國家爲夷
夏宗主屬國不奉條約正當以義結之於是遣
一小校持檄往諭二酋頓顙受命卽日釋兵或
告昭州故盜甘文誠者謀叛去郡給而縛之欲
致之死維察其非辜撫遣之未幾象郡徭反使
者欲調兵逐捕維曰以官兵入箐歷險與猿獠
角勝負非計也遣裨校戍山口且文告之徭曰
前年殺凌鐵往年殺王宣今年又殺甘文誠非

從若招者耶誰敢聽命維遣文誠示之則皆大喜亟遣子入謝罪進直徽猷閣留鎮五年孝宗方謀北畧移軍建康使者謀作屯營不如指乃召維爲江南東路計度轉運副使趣入面對獎維治績且屬以營屯事營屯新治就加秘閣修撰以寵其勞江東歲和糴以備儲積先是嘗糴三十萬或以予直太高而損其半維力爭不能止至是復以命維而詔問所以經畫狀且曰監前失毋傷民維卽條奏曰前事之失民以陛下

爲不知故獨歸怨有司今旣知之乃曰姑以爲監而不能償則天下將有以空言疑明詔者矣尋召入奏事因訪軍務得失稱旨留爲尙書左司郎中丁艱服闋除司農少卿再入都司初維在桂常言熙豐行義倉法獨不及南方至是復以爲言從之維資稟端裕不見喜愠家無姬媵祿稍以班族里平居接物甚夷剗之節遇事乃見敷歷中外聲績藹然朝廷嘉重卒以不能逢世不大見於設施所著有槩澗集奏議若干

卷

馮夢得字初心其先河南固始人自三世祖諱遵者奉勅世守閩遂擇地南劍州居焉先生幼讀書有異質塾師以大成器之比壯篤志嗜學博洽經史登宋嘉禧二年進士累官禮部尙書初任給事中時敢死諫不避斧鉞轉侍郎有干進者以金餽公叱卻之文天祥稱其輔國經畫言中其長巨才洪識卓越大臣之表殆深知公者也卒贈大師誥勅有曰養其氣以剛大尊所聞

南平縣誌

卷之十二

鄉賢

七

則高明博觀載籍遠追正始知言自況於孟軻論事肯卑於陸贄放海南而如在朝廷酌古今而若幹造化節不可奪道闇而章先生修身致主之學殆與四賢後先相輝映歟

明

劉 璋 羅 明 胡 瓊

黃 焯 鄭慶雲

父應林中子

游居敬 林昌麟

父綸子於北於廣

國朝

劉璋字廷信幼失怙母翁氏苦節撫教之稍長卽

國朝鄉賢林昌麟目錄宜另行標載不宜
附入此處今爲批明
以俟修志更定

知力學天順元年成進士授戶部主事器度温雅濟以廉慎大爲長官所器遷本部郎中歷山東左右叅政時歲歉且疫璋與同官二人分道賑卹二人相繼染疫死璋悉心往來經理弗倦亦弗懾也尋遷浙江左右布政使浙雖大藩而諸郡倉儲多缺璋通計出入尙欠米二十二萬石軍儲停支皆欲棄伍璋恐若輩一動必滋事端徑支巡撫積貯餘糧價銀二萬五千兩折給又奏准諸郡歲輸戶口食鹽鈔令照時價納米

習黃河水性者操之通運二十七萬石以往復奉勅兼撫鳳陽等處會鄖陽流民嘯聚朝廷恐其滋蔓特命璋往撫治之先是蝗蟲爲災民憂惶無計璋至大雨如注蝗盡投水死民情大悅未幾改撫四川時亦乏糧有詔許農民入粟補吏璋命有司聽其納銀且減其數旬日間得銀萬餘兩給以平糴歲足軍需仍餘米八萬石前播州宣慰揚輝鍾愛庶長子友請特設安寧宣撫以友爲之築城堡以居其後友謀奪嫡誣奏

其弟愛有不軌謀而愛亦訐友不法事朝廷遣大臣勘得其罪罷友宣撫并家屬發保寧府安置璋以安寧道遠城堅友少弟敏及所親附天家仲家士兵素號驍勇其屬又有爲之謀主者恐負固爲變且貽害故不卽發詔先遣友親信二人詣安寧慰其家屬曰撫軍謂宣撫遠出弟敏年少特遣吾輩護印信以防外侮又遣能幹土官領兵分截安寧出入之路榜示天仲二家諭以順逆禍福懸重賞以購主謀區畫既定乃

宣示詔旨遣官收其家屬印信而發遣之尋復奉勅省刑有僧如方坐命案抵罪璋察其冤立出之所平反免死者凡四十餘人入爲工部侍郎陞南京禮部尙書在部清慎以嚴率屬洪治七年召代賈俊爲工部尙書俊素廉慎居工部八年望孚朝野璋在工部亦數有爭執名亞於俊九年以老乞休加太子少保馳驛歸仍命有司歲給廩隸如制璋蒞官垂四十年處事精密喜慍不形家居屏跡官府觀書吟咏以自樂年

南平縣誌

卷之十二

鄉賢

十

八十三卒賜祭祀府鄉賢

羅明字文昭成化二年進士拜河南道監察御史奉勅清理浙江鹽法均徭戢橫豪強斂跡出按廣西適有內批命鎮守少監黃泌貢其地珍禽異鳥明奏止之行部所至憲度嚴整貪墨吏望風解綬還掌道事會冢宰員缺覬覦者衆明率同列疏請公舉必得才德兼茂聞望素著方可勝任若非其所關不細由是奔競少戢東直門灾朝廷範白金爲眞武像遣內監送武當山

崇祀以弭災變明疏言徒費財擾民無益於事
又因災異迭見力陳修省且言鑾輿遊幸南城
西海錫賚無度非敬天弭災之道時有大臣以
賄罷而夤緣復進者又有近倖奏請得錄其幼
子入監者又有方面以考察被汰而妄訴屈抑
得復職者明並請追寢成命時論躉之出爲陝
西按察副使奉勅撫治漢中漢中山深林密每
爲逋逃淵藪奏立白河縣以安輯之內艱去任
民遮道涕泣不忍舍起復仍副陝憲屬州有竊

發嵩洛銀鑛誣逮平民論死者四十餘人明力
爲辯雪坐者三人而已遷本省廉使值歲旱饑
民相食明講求荒政全活甚衆仍條救荒十二
事上之多見施行遷雲南左布政使尋擢右副
都御史巡撫甘肅其地卽古河西五郡控引西
域流沙諸部番胡參錯號稱難治明居陝日久
稔知宿弊至卽奏罷貢獻以息橫斂復奪勢家
所擅草湖還之軍士均水利清兵馬蠲逋負多
所建白尤盡心於學校請增貢額以振淹滯選

秀民著錄庠序以教育之先是甘肅祭先
聖率用俗樂明命有司依禮制備古樂舞器服
而演習之八音既諧乃以奉祭邊方由是知有
雅樂洪治己酉東路有小警且有詔錄囚明舊
苦煩疾至是以勞復作遂卒後旬月朝廷以明
有區畫哈密功璽書褒獎晉工部右侍郎皆不
及見矣訃聞賜祭葬明爲人外和內剛歷官二
十餘年清介勤慎始終一致祀鄉賢子雲麟字
世歲年十五遭明喪自燉煌徒步扶襯歸當蔭

南平縣誌

卷之十二

鄉賢

十二

敘讓弟雲鳳以責任湘鄉訓導致仕屢飲大賓
胡瓊字國華號九峰子正德辛未進士除知慈谿
縣慈谿多顯宦其子弟干請不遂則羣嗾之使
去瓊至公明自持勢宦不得出一語反德焉蒞
慈三年治績甚著召入試山西道御史考授一
月以疾歸結廬東溪之麓與二三同志講學疾
愈起巡按貴州貴遠在絕徼民夷雜處致多頽
廢瓊風裁飈發鈎刷奸弊毫髮不遺毀淫祠興
學校立名宦鄉賢以昭示來者土苗作梗計捕

平之請設兵備於雲南霑益以便控制奏中官
王閏之賍發總兵昌佐不法事臧否諸司靡不
帖服人以太御史目之內艱服闋起掌山西道
以議大禮廷杖卒瓊天性孝友事嫡母如所生
家事悉以付弟私室不蓄一錢延俗父母喪在
外不敢迎歸以爲不祥瓊造新室迎母喪朝夕
臨奠不變於俗詩文清新流麗對客揮毫灑墨
咄咄逼人著有九峰稿奏議若干卷藏於家

黃焯字子昭正德甲戌進士由南禮部精膳司主

事歷知永州府永民惰於耕桑焯勸導之永之
風俗親歿輒多破產齋僧若無以葬則委之於
野焯禁而治之俗因爲之一變前用兵於九溪
蠻軍需悉出自民郡有鹽引前守錢公率入於
私橐焯令貯庫以充兵餉民賦漸紓郡治有舜
塚置祀田設守者二人建周濂溪祠闢東山書
院聚文學子弟教之郡人由是益知學擢湖廣
左叅政攝藩篆三月百度惟貞庫羨毫無所取
以疾告歸葺觀物園孝奉二親朝夕承志親歿

祭葬如禮日從事翰墨著述自娛接親舊破崖岸非分請託則嘿不應林居十餘年非公事未嘗一入城府所著有遵美堂政錄修來篇論語中庸讀法貽光堂集藏於家祀鄉賢父中字大本以貢入南雍授武康丞視篆疏河渠廣儲均役民咸利之性至孝父疽發背侍湯藥匝月衣不解帶葬其伯鉞歸族叔翰之櫬於珠崖間恩誼咸篤以焯貴進中順大夫家居年八十屢筮大賓及卒門人私謚曰貞孝華亭徐階爲表其

墓焯子應林字德甫由鄉薦令遂昌以才優調太平楚門海田多爲潮汐所嚙林請之當道築堤疏河田以無害邑有雁鳴山捐俸建塔以培文運復調樂昌治聲蔚起致政歸著有四書講義量田管見藏於家

鄭慶雲字舜祥幼奇敏爲文多不屬草其詞乃若宿構登正德甲戌進士知瀟山縣部使者優其才調煩南昌當是時寧庶人方恣橫慶雲不爲撓踰年徵拜南禮科給事中世宗卽位首劾中

官楊琳貪不奉法及留守大臣之不職者會議
大禮與時宰不合引疾歸所著有劍溪愧稿及
延平郡志

游居敬字行簡號可齋嘉靖壬辰進士改庶吉士
授監察御史嚴介執法毫不容私巡視蘆溝按
商人匿稅語侵司農司農憚之巡按應天劾偽
學捕奸黨出徽民之久滯獄者池州守某倚相
勢恣睢爲墨到卽按之雖時相爲之先容弗顧
也出爲浙江僉事覈吏俗畫民便利禁湖游戢

戒壇杭俗爲一變擢廣東湖廣叅政仍按察浙
江歷左右布政使內艱服闋補原任時倭寇猖
獗調主客兵以數萬計庫無贏羨百凡倚辨居
敬咄咄辨之議者欲練土著汰客兵客兵當關
而譟督撫無策居敬前諭之皆解散外艱歸起
右副都御史巡撫雲南鎮守沐朝弼故恣橫居
敬裁以分義歸其所侵騰越州庄田東川蠻酋
阿堂亂謀篡東川強奪府印擅立作亂奔馬撒
致與宣慰安萬銓土官安九鼎相攻十餘年矣

至是復侵羅雄州逼會城居敬疏請聯川貴兵
誅之有旨令川貴撫按勘明具奏居敬因屢招
阿堂不服乃出不意督土漢兵進勦阿堂窘急
自刎死三省遂定沐朝弼故啣居敬言於巡方
王大任以不俟朝命會勘輒興兵疏劾居敬坐
逮杖論戍碣石穆宗卽位赦歸廷臣交章訟居
敬召起南刑部右侍郎轉左高拱再相欲甘心
徐階凡見彈劾者一網空之居敬語所善同官
曰相君必不忘情華亭計所嘗牴牾特斤斤耳

孰與姑舍是以謀社稷乎拱聞之恚嗾其門生
以老論居敬居敬方上三疏一言中貴擅權一
言時宰作威福一言羅從彥李侗宜從祀孔廟
拱擬旨摘其詞繁稱奪俸三月遂乞歸或勸少
緩旬餘恩蔭可得居敬不顧越四月卒訃聞賜
祭葬居敬平生學務實踐衣粗食糲一席十年
漆枕櫛匣尙青衿時物歷官四十年歿後諸子
有不能舉火者所著有五經旁註可齊文集奏
議丹園集及延郡志若干卷祀鄉賢父綸字邦

濟以貢卒業南雍選授睢寧令政務安靜與民
休息有蠹民者亟除之捕蝗災濬河道憫邑凋
瘵申減協濟邳州夫千餘名睢民德之膺封致
仕家居杜門簡出樸素有古人風勉子盡心職
業卽所以爲孝居敬子於北字懷蓋由恩貢選
令雩都有巨奸殺人匿尸屢經會審莫決於北
廉得其情獲尸牆下抵奸於法當道旌其能調
令醴陵丈量一灑積弊邑稱公平於廣字懷約
居敬之被逮也蓋方討阿堂在兵間云兵間去

會城五百里時於廣從宦官舍年方十六冒寒
凍疾走三百餘里尾居敬居敬已至貴州界矣
於廣且饑且馳旬日始逐及於普定驛居敬曰
孝哉兒也旣長從閩王應鍾講學後以太學生
以蔭授太僕簿節縮馬價千餘遷上林丞歷戶
曹郎總推邗關預修玉牒以勞卒官

林昌麟字尼臣號青蓮又號北山靖安令松濤公
次子也祖居南邑西溪茶坑發源天台乃祖茶
子公諱就日遊楚黃授麟經眞詮遂家府治北

山築瑞雀樓爲讀書處先生幼而穎慧過人見書卽能悉記茶子公初授以孝經繼授以春秋便孜孜不輟喜而不寐茶子公指而謂曰麟經家學其始於予而昌於子乎先生遂以此命名焉陳鍾文公奇其才以女妻之及長不從他師隨仲叔直菴公諱筆癸卯賢書遊呶唔瑞雀樓中慨然曰人生歲月不可恃壯盛智慧不吾來不於此時有所著述寂寂人間徒湮沒老耳不幾負此日月也哉因自朝至昃不遑夜以繼日凡五經

旨趣聖賢微言以及詩詞歌賦無不洞然於胸中故其爲文也幽古離奇無一語寄人籬下順治己亥松濤公出宰新城先生天性孝友隨親之任督糧京師同勦靡鹽舟過鎮江有相者曰公福德俱佳惜猶有未盡處從者阿之先生斂容肅然起敬問故相者曰天與君以才不與君以壽已運當有一津過此應在古稀之外先生心焉藏之遂絕意仕進篤嗜詩書雖僕僕風塵之下終不以彼易此道義之氣一發於詩歌濡

毫染紙百韻俱落倏忽淋漓其上矣丁未松濤
公再補豐城豐古饒邑也車轂擊人肩摩車馬
輻輳商賈奔馳號爲名勝區且人文輩出如丁
澹園先生諱蕙雷君諱曾舒君諱其琯輩皆玉
堂偉望積學有聲產於其地者知先生湛深理
學愛之慕之無不折節請教遊金焦二山諸僚
佐畢集相與刻燭以紀一時之勝先生援筆立
就不假思維在座者無不心異其才咸慶公得
有令子焉癸丑春始回延省萱親赴試補郡弟

子員卓有聲名然以耿逆之故未及咨部維時
邦家多難綢繆外侮無有休息親族避難者踵
至其門先生於日用飲食無不欸納如平時未
嘗以時艱辭之其豪俠如此甲寅秋元配陳孺
人仙逝高堂甘旨乏供承親命繼室蔡孺人乙
卯松濤公又爲督撫董公諱安國題請旋調靖
安夫靖固山僻之區經殘破之後一時盜賊充
斥人民多流亡當事之題請也亦謂公能致身
報國智勇兼全耳先生聞之寢不安席食不甘

味思唯此方非可安坐而理急辭萱堂而數日
至西江兼程而進人非不自惜也顧以先生孝
心純篤欲以勸父勞耳始至之日請於其父布
大公以招徠開至誠以安撫其民去而爲盜者
咸投忱待命不啻如晉悼公服鄭焉佐靖數年
錢穀簿書代親維持絕不假手幕賓常嘆曰衙
門吏役作弊甚多若明察不至雖有愛民如子
實心亦終爲人所蒙蔽矣因力請於其父去大
害革積弊除奸宄而惠良民催科之中寓以撫

字正供之外不索秤頭布政施教境內肅然所
以松濤公在邑有慈母神明之號凡靖之紳衿
士民知先生能相父以致君澤民於其來也歡
欣載道感靖邑有賢令猶感令之有賢子無不
以望見顏色爲幸歲屆戊午海內承平人心樂
業先生瞿然思曰父兮生我母兮育我欲報之
恩昊天罔極今天各一方兩地睽違不得竟其
溫清定省之職且爲人子者朝西暮東僕僕道
塗何日得盡其志乎於是與其兄諱起麟計遂

奉親抵靖然是歲八月而萱堂告訃矣先生哀痛盡禮枕磚寢苦三年未嘗見齒己未松濤公以招撫有方題請適有內召之命當時先生以父年老跪請曰宦海無涯知幾其神昔人云知足不辱知止不殆功成身退天之道也吾父歷任西江數十年仕途甘苦已備嘗矣曷若致政歸田爲休息天年計乎松濤公於是決意解組出境之日公卿大夫老稚邑民皆設祖道供帳城門外攀轅不舍僉曰此真從來未有父母也

歎息泣下如二疏歸田云庚甲抵家園先生遂杜門謝客靜坐樓中課訓于姪門人慕李白高風自號爲青蓮逸士辛酉歲輯著四書庭訓及孝經麟旨秘擬古今文章壬戌輯詩經庭訓自娛集是歲之夏丁澹園夫子督學閩南衡文事竣登其堂造其廬見其著作之富不禁肅然興松濤公言曰世兄洵一代理學名儒也流連竟日者久之因勸之仕不應曰士各有志毋相強也吾將見聖賢於羹牆矣自書樓聯句傲骨難

逢世才疎僅著書訓子以文藝則曰作文無別法昔人云多讀多作老蘇當日取孟子韓子經史諸書讀之七八年後來便做出許多好文字今人資質不能及此讀之不必取其多唯求其精平日宜將經書旨趣爛熟於胸中后取古今佳文而口誦心維久之自有得心應手之樂讀書須嚴立課程毋或作或輟苟口誦書而意雜身對書而心馳工夫無由而純熟也訓子以交遊則曰君子小人以類而聚昔人云君子之徒

同德小人之徒同惡外甚類中實遠諺云結交須勝已似我不如無况小人乎訓以詩詞則曰當今以制藝取士待博得金紫后及詩詞歌賦未爲晚也昔人云荆山之璞雖美不琢不成其器顏冉之才雖茂不學不宏其量汝既具有用之才自當營心舉業遠繩祖武若悠悠忽忽是美玉未琢無異於砮砮也居恒屏黜浮圖曰仙佛何必遠求家有二親卽活佛也兄弟聚首卽眞仙也士子得官如得道寒儒登第便登天矣

裴晉公云雞豬魚蒜逢着便喫生老病死時至則行卓哉斯言也癸亥輯禮記麟文攷古纂要甲子輯易經性理纂要諸書至丙寅春告成夏輯書經醫學纂要丁卯輯春秋庭訓一書以成祖父之志是時尚未告竣而先生疾作矣其子姪門人請輟筆先生喟然曰四書庭訓等書已告成矣而春秋不獲竣事可乎此書上係先人之傳下啟後人之緒倘不加意小子何述安可以疾而廢家學也且予亦樂此不爲疲抱病著

書戊辰之莫春月而疾不復起矣臥床講書親朋畢集欲爲請禱先生哂曰生死命也禱何爲哉夫子云朝聞道夕死可矣假使神無知則不能降福有知固不可私已而媚說之也且人年至五十不爲天但以親老不能終養爲恨耳手書戒其子曰勉之勉之昔人云積金以遺子孫子孫未必能守積書以遺子孫子孫未必能讀吾雖無經遺汝承祖父福蔭家今差於昔無恤饑寒菲飲食薄衣服節夫一者亦可以讀書凡

此手輯經傳述先聖精意整百家紛言庶幾竭
吾才女唯時其玩味尋繹研鑽不替敬慎威儀
以近有德可以不辱於所生若忽焉不識亦已
焉哉是月也念二日夜半在子猶談古今書史
論鬼神之爲德章意且曰鬼神之理幽渺難知
昔人云獨行不愧影獨處不愧衾吾自念生平
無一不可對人言者而今而後庶幾免夫辰刻
東首披衣冠辭親至巳刻而先生卒於正寢年
正五十也先生天性孝友然諾不欺襟懷灑落

不妄交遊視軒冕如草芥屏嗜慾若沙泥淡泊
明志寧靜致遠勤以力學儉以足用飯一盂蔬
一盤冬一棉夏一葛凡人有求輒應與之未嘗
以故辭策事後當否若燭照龜卜亦能山水酷
類雲林筆意嘗於嚴寒冰凍之夜手抱一編吟
哦達旦覺時唯見雪深三尺矣隱居北山著書
瑞雀樓不求聞達以理學著名於當時後進私
謚文淵因其所居之地稱曰北山先生
論曰父在晨昏定省母沒寢茨枕塊先生之孝

也身爲諸生隨親行役先生之忠也負志氣不
欺然諾能爲人通有無先生之仁也處親族間
恂恂自下始終無間言先生之恭也剛決似乃
考文藝似仲叔離奇幽古絕不讀漢魏以後書
雖止於博弟子員不獲大展其用天非故抑之
也天正欲以理學勞其衷自不以紛華累其志
凡所以歷試諸艱者正使之深其養精其業開
後進於無窮耳噫若先生者洵當代名儒而非
僅一鄉一國之彥也乎